

In'educaziun bilingua cun success

Saira d'infurmaziun da la Lia Rumantscha e da l'Uniun da scolina Cuiria

■ **(lr)** In accent da las activitads da la Lia Rumantscha (LR) sa fatschenta cun la realitad bilingua da la gronda part da la populaziun rumantscha. I va per far attent als avantatgs ed a la plivalur da la bilinguitad. Savair discurrer dapli che ina lingua porta numerus avantatgs. Ins emprenda pli tgunsch auters linguatgs, ins dumogna meglier differentas situaziuns da comunicaziun interculturalas e forsa gidan cumpetenzas en pliras linguas schizunt cura ch'ins s'annunzia per ina plazza. Ma per differentes motivs na gartegia in'educaziun bilingua betg adina senz'auter. Vitiers vegn in quità ch'ins auda regularmain en quest connex, numnadamain la dumonda schebain uffants na sajan betg surdumandads sch'els creschan si cun pliras linguas a la giada.

Per dar resposta a quella ed autras dumondas e per refutar dubis e resalvas organisescha la LR ensemen cun l'Uniun da scolina Cuiria ina saira d'infurmaziun. L'occurrenza sa drizza a geniturs ed autras persunas responsablas per l'educaziun d'in ambient famigliar biling che vulan porscher a lur uffants in'educaziun ed ina furmaziun bilingua rumantsch-tudestg.

Las finamiras èn da preschentar vias co ch'ina educaziun bilingua en famiglia po avair success, da sclerir a moda illu-



Ils avantatgs d'ina educaziun bilingua vegnan preschentads ils 22-02-2017 en Chasa Rumantscha a Cuiria.

strativa ils avantatgs d'ina educaziun bilingua e da mussar las pussaivladads ch'i dat a Cuiria en connex cun la furmaziun bilingua en rumantsch e tudestg. Da la partida vegnan ad esser *Flavia Buchli*, presidenta da l'Uniun da scolina Cuiria, *Flurina Plouda Lazzarini*, mussadra e responsabla per il program da kidsfits da la LR Rumantscha e *Conradin Klais*, manader furmaziun LR. Els stattan gugent a disposiziun per dumondas e cussegls.

Lieu: Lia Rumantscha, Cuiria

Data: mesemna, 22-02-2017

Program: 19.30 Co gartegia in'educaziun bilingua rumantsch-tudestg en famiglia?

Pertge duai mes uffant crescer si cun pliras linguas?

Tge pussaivladads datti a Cuiria per ina furmaziun bilingua rumantsch-tudestg?

20.15 Discussiun ed aperitiv

Referentas e referent:

Flavia Buchli, presidenta Uniun da scolina Cuiria

Flurina Plouda Lazzarini, mussadra e responsabla per il program kidsfits da la Lia Rumantscha

Conradin Klais, manader furmaziun Lia Rumantscha